

Arubahuis ya a celebra Dia di Betico na Den Haag

DEN HAAG/ORANJESTAD – Na Cas di Aruba a tuma lugar diabierna 23 di Januari den cuadro di Dia di Betico un ceremonia na e busto di Betico Croes. Minister Plenipotenciario Sr. Frido Croes y esposa sra. Lourdes Croes-Figaroa a pone un flor na e busto di Betico den presencia di e director di Cas di Aruba Sr. Kenkey Oduber, director di ATA Europa sr. Humphrey Vrolijk y personal di Cas di Aruba y ATA Europa.

Minister Plenipotenciario den su discurso a enfatisa ariba e lucha di sr. Betico Croes pa e Status Aparte di Aruba. Un lucha cu awe na Aruba nos por mira e frutanan, mescos cu ta e caso aki na Hulanda, asina e mandatario a bisa e.o..

Sr. Croes a bisa cu un persona ta fayece dos biaha. E momento cu un persona bay laga nos y e momento cu nos lubida ariba un persona. Loke ta e ultimo aki nunca nos por permiti pa nos lubida cu un persona humilde manera sr. Betico Croes a bringa pa nos Status Aparte.

“Mi ta spera cu ariba Dia di Betico nos tur para keto y mira kico nos a logra awe y puntra nos mes si nos a logra esaki tambe sin e ayudo di sr. Betico Croes. Pesey ta na su lugar, riba e fecha natalicio aki, pa nos reflexiona y percura pa di nos banda nos duna tur cu nos por pa defende y proteha e logronan grandi cu a hiba nos Pais unda e ta awe. E lucha no a termina ainda.”

Despues di e discurso tur esnan presente a canta Aruba su himno Aruba Dushi Tera y despues conhuntamente den Sala Betico a bebe un kopi di coffie.

